

1615.

²⁹
8. Carl 17 12

LETTRE
D V R O Y
A MONSEIGNEVR
LE PRINCE.

M. DC. XV.

THE UNIVERSITY
LIBRARY

Case

F

39

.326

1615 Lou



LETTRE DV ROY A
Monseigneur le Prince.

MON Cousin, Je vous ay par plusieurs fois fait sçauoir le desir que i'auois que vous m'accompagnassiez au voyage que ie vaz faire en Guyenne pour l'accomplissement de mon Mariage, & vous ay fait conuier de vous y disposer & venir pres de moy pour ce subiect: Et mesme ie vous ay fait sçauoir mes bonnes intentiōs sur quelques points dont vous desiriez estre esclaircy auparavant vostre retour, tant sur les affaires generalles que autres, Ayant pour cest effet ennoyé à diuerses fois vers vous le sieur de Villeroy qui y est encores à present, & par lequel vous auriez peu aussi estre informé & asseuré de mon affection & bien veillanee

A ij


& de celle de la Royne Madame ma
 Mere en vostre endroit : Neātmoins
 ie n'ay peu iusques à present sçauoir
 vostre intention pour ce regard,
 n'ayans encores eu que des delaiz &
 & remises de vostre part. Ce pen-
 dant estant pressé de macheminer,
 l'enuoye le Sieur de Pontchar-
 train mon Conseiller & Secretai-
 re-d'Estat par de là, pour avec ledit-
 Sieur de Villeroy vous dire la re-
 solution que i'ay prise de partir pour
 faire mōdit voyage Samedy premier
 iour du mois prochain sans retarde-
 ment, vous prier & conuier derechef
 de ma part de reuenir pres de moy
 pour m'y accompagner & y tenir le
 rang qui est deub à vostre qualité &
 naissance, ou bien dire en presence
 dudit Sieur de Pont-chartrain, Si
 contre ce que vous m'auiez fait espe-
 rer vostre intention est dy apporter
 refus ou difficulté & me desnier ce


31

contentement, afin qu'il m'en ap-
porte entier esclarcissement, estant
le principal subiect de son voyage.
Me remettant doncques sur ce que
ledit sieur de Villeroy & luy vous en
dirôt de ma part, Je prie Dieu, Mon
Cousin, qu'il vous ayt en sa saincte
garde: Escrite à Paris ce 26. iour de
Juillet 1615.

Signé LOYS.

Et plus bas DE LOMENYE.





RESPONSE
DE MONSIEUR
le Prince au Roy.

SIRE,
Ayant appris par celle que V. M.
m'a fait l'honneur de m'escrire par
le Sieur de Pont-chartrain du vingt-
sixiesme de ce mois, la prompte re-
solution que vous avez prise de par-
tir pour vostre voyage de Guyenne
& le commandement qu'il vous plaist
me faire de vous aller trouuer pour y
accompagner V. M. l'ay estimé que
ce partement si precipité sans au para-
uant auoir donné ordre aux affaires de
vostre Estat & pourueu aux desordres
qui vous ont esté représentées, tant
par les Estatz Generaulx que par vo-
stre Court de Parlement de Paris,
estoit vne continuation des mauuais
Conseilz de ceux qui en sont les au-

theurs, l'esquelz ie n'ay cy deuant nō-
 mez dans mes tres-humbles remon-
 strāces, afin de ne vous desplaire SIRE
 ny a la Royne vostre mere soubz les-
 perance que i'auois qu'ilz cesseroient
 d'abuser de la bonté de V. M. mais
 puis qu'ilz continuent à se seruir de
 vostre authorité pour pretexte & cou-
 uerture de leurs pernicieux desseings
 en violentz Conseilz trop recognuz
 aujourd'huy pour en doubter, &
 trop publicqs pour les tollerer & souf-
 frir plus long temps puis qu'ils tournēt
 à la subuersiō de vostre Estat à l'affoi-
 blissement de vostre Couronne & à la
 ruyne de vostre maison & d'autres
 Princes Officiers de vostre Couronne
 & principaulx Seigneurs de vostre
 Royaume. Je suis contraint, SIRE, a-
 pres vne lōgue patiēce représenter à V.
 M. avec toute l'humilité & le respect
 que doit vn tres-humble subiect à son
 Roy, les iustes raisons qui m'enpeschèt
 d'obeyr

d'obeyr si promptement a vostre cō-
 mandement, ie diray doncques à V.
 M. que lors que ie mē fus retiré à Creil
 vous ayant pleu enuoyer vers moy M.
 de Villeroy pour mē commander de
 vostre part de vous aller tro uuer avec
 offre qu'il me fit que V. M. aduiferoit
 de donner vn bon ordre aux affaires
 publicques de son Royaume ie luy fis
 responce que ayant esté huiet mois à
 Paris ou i'auois veu le commancemēt
 le progrez, & l'issue des Estatz, telle
 quelles ont esté les procedures qu'on
 y a tenues pour pratiquer & corrom-
 pre les Depputez & en elluder les de-
 liberations & resolutiōs: le parlement
 gourmandé & indignement traicté
 pour auoir voulu seruir vostre M. ma
 vie & celle de plusieurs autres Princes
 & Seigneurs de qualité mise en com-
 promis, par ce que ie disois libre-
 ment avec eulx mes aduis dans voz
conseilz sur ce qui s'y presentoit pour

vostre seruice, & le bien de vostre
 estat ie n'y pouuois retourner avec di-
 gnité ny seureté, iulques a ce qu'il eust
 pleu a V. M. pouruoir à la reforma-
 tion de ses Conseils & aux desordres
 publicqs contenuz es remonstrâces de
 vostre Parlement sur quoy derechef
 ayant pleu a V. M. de renuoyer vers
 moy ledit sieur de Villeroy à Clermôt
 avec quelque pl⁹ ample pouuoir qu'il
 n'auoit à son premier voyage, nous cō-
 ferâmes ensēble de la reformation de
 vosdicts cōseilz & des reglemēts qu'il
 auoit eu charge de me faire veoir, &
 pour le regard des remonstrances du
 Parlement i'ay reserué a luy dire mon
 intention apres en auoir conferé &
 pris l'aduis des autres Princes officiers
 de vostre Couronne & Seigneurs qui
 concurrent en mesme opinion avec
 moy, ilz ne sont moins affectionnez à
 vostre seruice au bien de vostre Estat
 & affermissement de vostre Couronne

ainfi que ledict fleur de Villeroy a fait
entendre à V. M. laquelle n'ayant
point desagree ce qu'il auoit commé-
cé a traicter, auroit encores trouué
bõ de les renuoyer en ce lieu ou estat
arriué des ce matin nous estions desia
entré en cõferance sur lesdictes remõ-
strances en sorte que les choses sem-
bloient estre es termes d'un bon accõ-
modemēt. Quant ledit fleur de Pont-
chartrain est arriué qui m'a donné les
lettres de V. M. & fait entendre
ce prompt partement lequel priue
le publicq du fruit qu'il esperoit
de l'issue de ceste conference rend
les choses qu'on y pouuoit promet-
tre impossibles à executer auant ice-
luy à cause de sa precipitation & par
ce moyen accroist les desordres
qui sont en vostre Estat dont ie suis
contraint de nommer les auteurs à
V. M. qui sont le Mareschal d'Ancre,
le Chancelier, le Commandeur de

Sillery, Dollé & Buillion, qui auoient esté seulement designez par les remonstrances du Parlement, desquels ie supplie tres-humblement V. M. faire iustice au publicq: Ordonnant que les plaintes faictes de leurs actiōs & deportements soient verifiees, & qu'il soit proceddé contre eux par les voyes ordinaires, suyuant les formes accoustumees: Comme aussi de l'assassinat cōmis depuis quelques iours en la personne du Sieur de Prouille, Sergent Major de vostre ville d'Amiens, par vn soldat Italien de la garnison de la Citadelle, ordonnant qu'il soit mis es mains des Iuges ordinaires pour luy estre son procès fait & parfait, ainsi que merite vn si meschant acte, iusques à ce que les reglements de vos Conseils soient faits & executez, les remonstrances du Parlement examinees, pourueu aux desordres contenus en icelles. Et la iustice faites

tât des personnes qui y sont designees
& que ie nomme à present à V. M.
que dudit soldat Italien, Ie la supplie
tres-humblement m'excuser si ie ne la
puis fuiure en son voyage, ce que au-
trement ie ferois & feray sans difficul-
té, s'il plaist à V. M. pouruoir à ces
choses auant son partement, voulant
toufiours par mon obeissance luy res-
moigner que ie suis,

SIRE,

Vostre tres-humble & tres-obeissant
subicct & seruiteur,
HENRY DE BOVRBON.

De Couffy ce 27. Iuillet 1615.

[Faint, illegible handwriting, likely bleed-through from the reverse side of the page.]



30

